

Uunga siunnersuut:**Inatsisartut Ombudsmandiat pillugu Inatsisartut inatsisaat****pillugu****Inatsisit Atortinneqarnerannut Ataatsimiititaliap****ILASSUTITUT ISUMALIUTISSIISUTAA****Siunnersuutip pingajussaaneerneqarneranut saqqummiunneqartoq**

Inatsisit Atortinneqarnerannut Ataatsimiititaliaq suliarinninnermini makkuninnga inuttaqarpoq:

Inatsisartunut ilaasortaq Harald Bianco, Inuit Ataqatigiit, siulittaasoq
 Inatsisartunut ilaasortaq Isak Hammond, Inuit Ataqatigiit, siulittaasup tullia
 Inatsisartunut ilaasortaq Justus Hansen, Demokraatit
 Inatsisartunut ilaasortaq Aleqa Hammond, Siumut
 Inatsisartunut ilaasortaq Akitsinnguaq Olsen, Siumut
 Inatsisartunut ilaasortaq Kim Kielsen, Siumut, ataatsimiititaliami sinniisussaq

Illassutitut isumaliutissiissuteqarnermut tunuliaqt

Biskoppeqarfia allaffia aamma Kultureqarnermut, Ilanniartitaanermut, Ilisimatusarnermut Ilageeqarnermullu Naalakkersuisoqarfik tamarmik immikkut novembarip ulluisa 15-ianni 17-iannillu Inatsisartut allaffeqarfianut saaffiginnissuteqarput, Inatsisartut Ombudsmandiat pillugu Inatsisartut inatsisisattut siunnersummi § 9-mut nassuaatit eqqoqqissaannginnerat malugeqqullugu.

Ajornartorsiuut tikkuarneqartoq taamaallaat aalajangersakkamut nassuaammut attuumassuteqarpoq. Inatsimmi aalajangersagaq (§ 9) eqqortuuvoq.

Ajoraluartumik inatsisisatut siunnersuutip Inatsisartunit siullermeerneqareernerata kingorna - tusarniaanermut akissuteqarnissamut piffissaritinneqartoq sapaatit akunneri arfinillit sinnerlugin qaaqtiutereersut – paassisutissat aatsaat Inatsisartut Allattoqarfianit tiguneqarput.

Inatsisisatut siunnersuutip siullermeerneqarnera sioqqullugu naqqiutinik taagorneqartunik agguassineq aqqutigalugu inatsimmut nassuaatit allanngortinneqarnissaannut periarfissaqarpoq. Periarfissarli taanna siullermeerinissap aallartinnissaata tungaanut taamaallaat atorneqarsinnaavoq. Taamaalilluni inatsimmut nassuaatit ilusaannik naqqiinissamut maannangaaq periarfissaqanngilaq. Aamma inatsimmut nassuaatit allanngortinneqarnissaannik siunnersuutinik saqqummiussinissamut periarfissaqanngilaq.

Taamaattumik ilaatigut tamanna pissutigalugu pingaarutilerujussuuvoq tusarniaavagineqartut piffissaq eqqorlugu akissuteqartarnissaat, taamatullu aamma Naalakkersuisut naalakkersuisoqarfiisa tamanna pisariaqarsorinaraangat tamatumunnga atatillugu suliffeqarfinnit atilerisanit oqaaseqaatinik pissarsiniartarnissaat.

Taamali oqareerluni Inatsisit Atortinneqarnerannut Ataatsimiitaliap ilanngullugu ajornartorsiutip tikkuarneqarsimanera qujassutigaa.

Inatsimmut nassuaatit marlunnik siunertaqarput: Siullermik inatsisissatut siunnersuutit Inatsisartut aalajangiinissamut tunngavissarisaasa ilagaat. Inatsisissatut siunnersuutip suna siunertarineraa inatsimmut nassuaatini nassuiardeqartarpooq aammalu inatsisissatut siunnersuutip pingaaruteqarnera kingunerisassaalu nassuiardeqartarlutik. Aappassaanik inatsimmut nassuaatit oqartussaasunut, eqqartuussivinnut allanullu inatsimmik atuisuusunut nassuaatit atorneqartarput.

Ataatsimiitaliap matumanit ilassutitut isumaliutissiissuteqarnermigut kissaatigaa inatsisissatut siunnersuummi § 9-p qanoq paasineqarnissaanut tapiliussamik (iluarsiissutaasumillu) ilanngussaqarnissani, tamatumunngalu peqatigillugu qularnaarlugu inatsisissatut siunnersuutip pingajussaaneerneqannginnerani Inatsisartut eqqortumik tamakkiisuunerpaa millu aalajangiinissamut tunngavissaqarnissaat.

Inatsisissatut siunnersuummi § 9 pillugu

Inatsisissatut siunnersuummi § 9-mi aalajangersagaq nutaajuvoq, Ombudsmandillu piginnaatitaaffiinik killiliinermik imaqarluni, pissutsinik ilagiit ajouersuutaannut imaluunniit upperisamik nalunaajaanerannut toqqaannartumik toqqaannanngitsumilluunniit tunngasunik Ombudsmandip suliariinnissinnaaneranik mattussisumik. Pissutsit ilagiit ajouersuutaannut imaluunniit upperisamik nalunaajaanerannut tunngasut taamaattoq aamma siusinnerusukkut Inatsisartut Ombudsmandiata misissuisarsimanerinut ilaatinneqarsimanngillat.

Aalajangersagaq Folketingip Ombudsmandia pillugu inatsimmi § 9-p assigaa.

Aalajangersagaq Inatsisartut Ombudsmandiata piginnaatitaaffiinik killiliinermik allamik aamma imaqarpoq: Ilagiit taamaallaat Inatsisartut Ombudsmandiata piginnaatitaaffiisa iluaniitinneqarsinnaapput ilageeqarnermi pissutsit pillugit aalajangersakkaniq Namminersorlutik Oqartussat aalajangersaasinnaatitaatillugit. Tamannali aamma inatsisissatut siunnersuummi § 7-p malitsigereerpa, tassani aalajangersarneqarmat Namminersorlutik Oqartussani kommuninilu pisortat ingerlatsinerisa ilaat tamarmik Ombudsmandip sulineranut ilaatinneqartut.

Kalaallit Nunaata Namminersorneranut atatillugu pissutsit assigiinngitsut pillugit inatsisikkut nr. 474-ikkut, ulloq 12. juni 2009-meersukkut Folketingip inatsit piginnaatitsissutaasoq (Kalaallit Nunaanni ilagiit pillugit inatsit nr. 264, ulloq 6. maj 1993-imeersoq), 1993-illu kingorna ilageeqarnermut tunngasuni Namminersornerullutik Oqartussat malittarisassiorsinnaanermut allaffissornikkullu oqartussaanerannut tunngaviusimasoq, atorunnaarsippaa. Tamanna Kalaallit Nunaanni Namminersorneq pillugu inatsimmi § 23, imm. 4-p malitsigaa, tassani aalajangersarneqarmat suliassaqarfiit namminersorneruneq

pillugu inatsimmi siusinnerusukkut atuuttumi § 5 naapertorlugu tiguneqarsimasut eqqarsaatigalugit Namminersorlutik Oqartussat tassaasut oqartussat inatsisiliorsinnaatitaallutilu atuutsitsisussaatitaasut.

Kalaallit Nunaata Namminersorneranut atatillugu pissutsit assigiinngitsut pillugit inatsisip atuutilernerani Kalaallit Nunaata biskoppeqarfiani biskoppitut atorfilik, inatsimmi § 8 naapertorlugu Kalaallit Nunaanni oqartussani susassaqartuni atorfinitssinnejarnissamik neqeroorfingeqartussaavoq. Kalaallit Nunaanni oqartussani susassaqartuni atorfinitssinnejarnissani biskoppip kissaatiginngippagu, pineqartup naalagaaffimmit atorfeqartitaanera ingerlaannassaaq, suliaminilli ingerlatsinera Kalaallit Nunaanni oqartussani susassaqartuni pissalluni.

Taamaattumik biskoppip naalagaaffimmit atorfeqartitaanera ingerlaannassappat, tamanna Inatsisartut Ombudsmandiata piginnaatitaaffisa avataaniissaqq, akerlianillu Folketingip Ombudsmandiata piginnaatitaaffisa iluaniissalluni.

Suliassani ilageeqarnermi oqartussat biskoppip peqqussuteqarneratigut taannaluuniit suleqatigalugu ingerlatsivigaanni, naatsorsuutigineqarpooq tamatumani misissuisoqassatillugu biskoppilu suli naalagaaffimmit atorfeqartinneqartillugu Inatsisartut Ombudsmandiata pisariaqartitsineq naapertorlugu Folketingip Ombudsmandia pisariaqartitsineq naapertorlugu peqataatittassagaa.

Taamatut oqaaseqarluni Inatsisit Atortinneqarnerannut Ataatsimiititaliap siunnersuut pingajussaaniigassanngortippaa, ataatsimiititaliap isumaqatigiittup inatsisissatut siunnersuutip akuerineqarnissaata inassutigineqarnera aalajangiusimallugu.

Harald Bianco,
Siulittaasoq
Inuit Ataqatigiit

Isak Hammond
Inuit Ataqatigiit

Justus Hansen
Demokraatit

Aleqa Hammond
Siumut

Akitsinnguaq Olsen
Siumut